

Kemajuan dinikmati bukan semula jadi – TPM
Utusan Online
18 Mac, 2012

JASIN 17 Mac – Tan Sri Muhyiddin Yassin berkata, kemajuan dan keamanan yang dinikmati rakyat pada hari ini adalah hasil daripada keberkesanan sesuatu dasar yang dilaksanakan oleh kerajaan dan bukannya datang secara semula jadi.

Timbalan Perdana Menteri berkata, keberanian kerajaan yang dipimpin oleh Barisan Nasional (BN) untuk mengambil langkah-langkah bijaksana, menyusun secara terancang dan melaksanakan dengan berkesan telah menjadikan Malaysia seperti apa yang dilihat hari ini.

Berucap di hadapan kira-kira 10,000 penduduk sempena Majlis Jamuan Rakyat peringkat negeri di Taman Maju di sini, Muhyiddin berkata, Malaysia kini dikatakan telah mencapai tahap negara membangun yang paling pesat pembangunannya.

“Ini tak mungkin jadi begitu sahaja, tanpa ada usaha, tanpa ada kesungguhan, kesediaan, perancangan, pelaksanaan yang dibuat oleh pegawai-pegawai kerajaan hingga kumpulan masyarakat yang hendak kita bantu ini mendapat pembelaan adil dan saksama.

“Sebab itu saya sebut ini ada hubungkait dengan kepimpinan. Mana peringkat sekalipun tidak akan maju dan berjaya kalau tidak ada daya kepimpinan yang bersungguh-sungguh, berilmu, bervisi, yang boleh lihat tidak hanya di depan mata tetapi jauh di hadapan, bukan setahun bukan 10 tahun ada yang sampai 50, 100 tahun akan datang,” katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0318&pub=Utusan_Malaysia&sec=Dalam_Negeri&pg=dn_02.htm